

Hujan malam

Terbenam dalam dakapan,
Bersama dingin hujan malam,
Menghempas titis di kaca jendela,
Masih rusuh mengenang kenangan,
Yang mencakar dada ingatan,
Membungkam sendirian,
Tanpa teman beradu,
Serasa ingin berlari dalam hujan,
Yang mencurah bersama titisan rawan,
Di kelopak mata layu,
Hanya TUHAN

yang tahu,
Sedih bertimpa datang bertamu,
Di ruang kusut yang jemu,
Nafas sesak lelah dan sendu,
Tiada siapa yang tahu,
Hanya hujan sebagai tetamu,
Peneman malam yang rancu.

Nukilan:

*Yasrah,
Universiti Putra Malaysia.*

Hanya satu undi

Kami warga taman ilmu ini,
Juga berhak untuk

mengundi,
Kerana tanggungjawab yang dipikul.

Kami tidak mengenali calon itu,
Baik perempuan mahupun lelaki,
Budi pekerti mereka,
Kami dengar-dengar sahaja,
Manifesto mereka,
Tidak memberi faedah kepada kami,
Baik buruk mereka,
Tidak dapat diadili.

Bukan tidak cakna,
Bukan tidak ambil kisah,
Semuanya angkara masa,
Program kami program istimewa,

Dalam tempoh masa setahun,
Tamat semuanya.

Semasa kami berkuliah,
Mereka bercuti,
Semasa kami bercuti,
Mereka berkuliah

Jadi atas dasar apa kami mengundi?
Mungkin hanya untuk air kotak dan roti.

Nukilan:

*Wanariahhamiza,
Cempaka 1,
Shah Alam, Selangor.*

Dengan izin-Mu

Gundah melanda

di kala senja,
Bercampur rasa,
Namun, siapa yang mengerti apatah lagi sudi mendamba citra,
Kecewa bagaikan menjeling tajam penuh bisa,
Tetapi aku pasrah merenung hadir sinar teman setia,
Sinar penyuluh jalan yang akan kulalui pabila sedia.

Istikharah menjenguk penuh ilmu,
Memanggilku memohon petunjuk-Mu,
Bersaksi kasih di atas sejadah syahdu,
Melihat dirinya

tersenyum riang bersama ibuku.

Apakah itu pasti?
Ku merenung... tidak lagi mahu terjemu,
Terkesima di dahan luahan rasa-Mu
Yakin dengan ketentuan-Mu,
Menadah pohon izin dari-Mu.

Nukilan:

*Muhamad Aizuddin
Mohamed Zain
Kolej Canselor,
Universiti Putra Malaysia, Serdang.*